

07 DEC 1999

Isa-pelantikan

TIADA CAMPUR TANGAN ISTANA, KATA ISA

PORT DICKSON, 7 Dis (Bernama) -- Menteri Besar Tan Sri Mohamed Isa Abdul Samad malam ini berkata tidak ada sebarang campur tangan daripada istana berhubung pelantikan Menteri Besar dan anggota exco kerajaan negeri.

"Tiada sebarang masalah berhubung pelantikan itu," katanya kepada pemberita selepas menyertai majlis melihat anak bulan Ramadan di Teluk Kemang malam ini.

Beliau berkata demikian ketika ditanya pemberita mengenai desas desus kononnya terdapat campur tangan istana menyebabkan Menteri Besar dan anggota exco belum lagi mengangkat sumpah memegang jawatan.

"Kita tidak tergesa-gesa untuk mengangkat sumpah. Tarikhnya akan ditetapkan," katanya.

Semalam, Mohamed Isa menghadap Yang di-Pertuan Besar Tuanku Ja'afar di Istana Besar Seri Menanti di Kuala Pilah bagi menyerahkan surat daripada Perdana Menteri Datuk Seri Dr Mahathir Mohamad mengenai cadangan parti supaya beliau menerajui kerajaan negeri untuk penggal kelima serta cadangan nama-nama anggota exco kerajaan negeri.

Majlis mengangkat sumpah Menteri Besar dan anggota exco pada mulanya dijadualkan pagi tadi tetapi petang semalam keputusan dibuat untuk menunda majlis itu.

Bagaimanapun Anggota Dewan Undangan Negeri tidak sempat dimaklumkan mengenai penundaan itu, kata Setiausaha Kerajaan Negeri Datuk Mohamed Ali Abdul Samad ketika ditemui petang tadi.

Hal ini menyebabkan Anggota Dewan Undangan Negeri pergi ke Istana Seri Menanti pagi tadi tetapi mendapati majlis itu dan Mohamed Isa tidak ada, sebaliknya majlis yang berlangsung ialah istiadat pengurniaan darjah kebesaran dan pingat bersempena ulang tahun ke-77 Yang di-Pertuan Besar baru-baru ini.

Ketika ditanya mengapa beliau tidak menghadiri istiadat pengurniaan darjah kebesaran dan pingat pagi tadi, katanya, beliau pergi ke Putrajaya untuk berjumpa dengan Timbala Perdana Menteri Datuk Seri Abdullah Ahmad Badawi.

Mohamed Ali yang turut hadir pada majlis melihat anak bulan Ramadan itu pula berkata tarikh majlis mengangkat sumpah Menteri Besar dan anggota exco akan ditentukan esok.

-- BERNAMA

RP MAI